

明

會

要

明會要卷二十三

永新龍文彬纂

輿服上

鹵簿

明鹵簿之制凡正旦冬至聖節會同冊封遣祭諸典禮皆錦衣衛陳之其儀仗則兵部車駕司掌之其造作則工部營繕司掌之其旌旗亦多與前代不同昉於洪武增定於永樂更造於宣德初以鹵簿彌文務從節省後隨時增設較初制爲便

通典

大朝儀制殿內左右扇二重內雙龍扇二十外素扇二十

二又外素扇二十殿門左右黃曲蓋繖二次左金交椅一金腳踏一次左金盆一右金罐一以外爲丹陛左右仗三重內雙龍扇二十次單龍扇二十外金節六次響節二十次領頭二又外左朱雀旗一右元武旗一次骨朵六次金鉞六次金鐙六次臥瓜六次立瓜六次儀刀六次梧桐杖六次班劍六次龍戟六次班戟六次左青龍旗一右白虎旗一次領頭二中道左右雙龍扇內紅花繖二次黃蓋繖二次紅方繖二次單龍扇內設大樂之所此外爲丹陛左右仗三重內黃蓋繖二次紅繡繖二次紅花蓋繖二次紅曲蓋繖二次紅花繖二次紅曲蓋繖二次紅方繖二次紫

方纒四次雉扇十次紅花扇十六外羽葆幢十次豹尾四次龍頭竿十次信旛十次傳教旛十次告止旛十次絳引旛十次黃麾二又外戟麾二十次戈麾二十次儀鉉麾二十凡三重皆有領頭各二中道右黃蓋纒馬杙一雉扇內左爲玉輅右爲大輅玉輅前爲步輦大輅前爲硃紅輦戟麾外左右設馬二十四仗下左右鳴鞭各三馴象各三此立仗之儀也至於出行鹵簿大略同前稍引而長之

春明夢餘

凡郊祀鹵簿大駕全設前期祀牲用丹陛駕其祭社稷鹵簿大駕內去白澤旗以下至元武豹尾大涼步輦祭太廟

山川並與社稷同耕藉田幸大學俱用鹵簿大駕王圻通考

吳元年十二月辛酉中書左相國李善長率禮官以卽位

禮儀進是日清晨拱衛司陳設鹵簿列甲士於午門外之

東西列旗仗於奉天門外之東西儀衛志

丙寅善長進儀衛上見仗內旗有天下太平皇帝萬歲字

顧謂善長曰古者九旗之制若日月蛟龍熊虎鳥隼龜蛇

之類所以昭儀物辨等威至大平萬歲字此夸大之詞非

古制也宜去之大訓記

洪武元年十月定元旦朝賀儀金吾衛於奉天門外分設

旗幟宿衛於午門外分設兵仗衛尉寺於奉天殿門及丹

陞丹墀設黃麾仗內使監擎執於殿上凡遇冬至聖節冊拜親王及蕃使來朝儀俱同其宣詔赦降香則惟設奉天殿門及丹墀儀仗殿上擎執云

十二年命禮部增設丹墀儀仗

宣德元年更造鹵簿儀仗

已上儀衛志

### 百官儀從

洪武二十四年更定官員儀從公十人侯八人伯六人一品至三品六人四品至六品四人七品至九品二人

成化元年令凡京官出外四品以上引導三對用錫槩鋼叉藤棍七品以上引導二對用錫槩藤棍外官方面堂上

官引導三對用錫槩鋼又藤棍各府及鹽運司等衙門四品以上引導二對用錫槩藤棍七品以上引導一對用藤棍八品九品用竹篾一對引導雜職不許引導已上王圻通考

天子車輅

大朝會拱衛司設五輅於奉天門玉輅居中左金輅次革輅右象輅次木輅輿服志

丙午四月乙卯太祖閱古車制至周禮五輅曰玉輅太侈何若祇用木輅學士詹同對曰孔子云乘殷之輅卽木輅也太祖曰以玉飾車古惟祀天用之常乘宜用殷輅然祀天之際玉輅未備木輅亦未爲不可參政張昶曰木輅戎

正德四年禮部侍郎劉機言大明集禮公卿大臣得乘安車因請定轎扇繖蓋品級等差帝以京城內安車繖蓋久不行卻其請而命轎扇俱如例行

輿服志

嘉靖十五年南京給事中曾鈞騎馬不避尙書劉龍潘珍

轎龍與鈞互相訐奏霍韜劾鈞且請禁小臣乘轎

霍韜傳

因

申明禮制四品以下不許乘轎亦毋得用肩輿

輿服志

時諸臣供事內廷許乘馬出入惟嚴嵩以衰老得賜腰輿

至八十再賜肩輿

野獲編

隆慶二年給事中徐尙劾應城伯孫文棟等乘轎出入驕僭無狀帝命奪文棟俸乃諭兩京武職非奉特恩不許乘



月重身卷二二三  
轎文官四品以下用帷轎者禁如例

萬厯三年奏定勳戚及武臣不許用帷轎肩輿並交牀上

馬

已上輿服志

時詔許后父永年伯王偉乘肩輿給事中萬象春言勳戚不乘輿祖制也固安伯陳景行武清伯李偉太后父衰白封始賜肩輿定國公徐文壁班首重臣嗣爵久故亦蒙殊典今偉非三人比乞寢前命皆不許象春傳

天子冠服

皇后附

天子袞冕服冕前後各十二旒旒五采袞元衣黃裳十二章日月星辰山龍華蟲六章織於衣宗彝藻火粉米黼黻

六章織於裳凡祭天地宗廟社稷先農及正旦冬至聖節冊拜皆服之

天子通天冠服郊廟省牲皇太子諸王冠婚醮戒則服通天冠絳紗袍

天子皮弁服用烏紗冒之凡朔望視朝降詔降香進表四夷朝貢外國朝覲策士傳臚皆服之嘉靖以後祭太歲山川諸神亦服之

天子常服烏紗折角向上巾盤領窄袖袍束帶間用金琥珀透犀

永樂三年更定冠以烏紗冒之折角向上其後名翼善冠

袍黃盤領窄袖前後及兩肩各織金盤龍帶用玉韉以皮

爲之已上王  
折通考

洪武元年二月己未學士陶安等請製五冕帝以其禮太

繁命祭天地宗廟服袞冕餘皆不用通典

二年五月上親祀外王父楊王廟禮官請御通天冠絳紗

袍祭畢召大臣問曰朕祭外王父卿等以爲不當服袞冕

何也宋濂對曰袞冕唯天地宗廟用之餘皆降禮也禮賢錄

二十四年帝微行至神樂觀見有結網巾者次日取之頒

示天下人無貴賤皆裹網巾於是天子亦常服網巾

馬后平居服大練浣濯之衣雖敝不忍易高皇后傳

嘉靖七年二月更定燕弁服初帝以燕居冠服尙沿舊俗  
諭張璠考古帝王燕居法服之制璠乃采禮書元端深衣  
之文圖註以進帝爲參定其制因諭禮部曰古元端上下  
通用今非古人比雖燕居宜辨等威因酌古制更名曰燕  
弁寓深宮獨處以燕安爲戒之意

八年諭閣臣張璠袞冕有革帶今何不用璠對曰按陳祥  
道禮書古革帶大帶皆謂之鞶革帶以繫佩鞶然後加以  
大帶而笏搢於二帶之間夫革帶前繫鞶後繫綬左右繫  
佩自古冕弁恆用之今惟不用革帶以至前後佩服皆無  
所繫遂附屬裳要之間失古制矣帝曰冕服祀天地享祖

宗若闕革帶非齊明盛服之意及觀會典載蔽膝用羅上織火山龍三章并大帶緣用錦皆與今所服不合卿可并革帶繫蔽膝佩綬之式詳考繪圖以進又云衣裳分上下服而今衣恆掩裳裳制如帷而今兩幅朕意衣但當與裳要下齊而露裳之六章何如已又論璉以變更祖制爲疑璉對曰臣考禮制衣不掩裳與聖意允合夫衣六章裳六章義各有取衣自不容掩裳大明集禮及會典與古制不異今衣八章裳四章故衣常掩裳然於典籍無所準內閣所藏圖註蓋因官司織造循習訛謬今訂正之乃復祖制非有變更帝意乃決令擇吉更正其制

又諭閣臣張璠云會典紀親征類禡之祭皆具武弁服不可不備璠對周禮有韋弁謂以韎韋爲弁又以爲衣裳國朝視古損益有皮弁之制今武弁當如皮弁但皮弁以黑紗冒之武弁當以絳紗冒之

已上與服志

### 諸王冠服

諸王助祭謁廟正旦冬至等朝賀服袞冕五采九旒衣五章裳四章朔望朝降詔降香進表四夷朝貢朝覲服皮弁服

王圻通考

洪武二十一年諸王來朝時制度未備諸王服乘擬太子戶科給事中卓敬乘閒言京師天下視效陛下於諸王不

早辨等威而使服飾與太子埒嫡庶相亂尊卑無序何以服天下

卓敬傳

嘉靖七年諭禮部朕仿古元端自爲燕弁冠服更制忠靜冠服錫於有位而宗室諸王制猶未備今酌燕弁及忠靜冠之制復爲式具圖命曰保和冠服自郡王長子以上其式已明鎮國將軍以下至奉國中尉及長史審理紀善教授件讀俱用忠靜冠服依其品服之儀賓及餘官不許概服夫忠靜冠服之異式尊賢之等也保和冠服之異式親親之殺也等殺旣明庶幾乎禮之所保保斯和和斯安此錫名之義也其以圖說頒示諸王府如敕遵行

輿服志

明會要卷二十三終



明會要卷二十四

永新龍文彬纂

輿服下

百官冠服

洪武元年命制公服朝服以賜百官禮部言各官散官與見任職事高下不同服色不能無異乞定其制詔省部臣議禮部復言唐制服色皆以散官爲準元制散官職事各從其高者國初服色依散官與唐制同乃定服色準散官不計見職所賜袍帶亦如之

輿服志

凡朝服赤羅衣白紗中單俱用青飾領緣赤羅裳青緣赤

羅蔽膝革帶大帶佩綬白襪黑履凡大祀慶成正旦冬至  
聖節及頒降開讀詔赦進表傳制則服之俱用梁冠一品  
至九品俱以冠上梁數爲差公冠八梁侯伯七梁駙馬冠  
與侯同一品七梁二品六梁三品五梁四品四梁六品二  
梁八品九品一梁

凡公服用盤領右衽袍或紵絲紗羅絹從宜製造袖寬三  
尺一品至四品緋袍五品至七品青袍八品九品綠袍未  
入流雜職官袍笏帶與八品以下同在京官每日早晚朝  
奏事及侍班謝恩則服之在外文武官每日公座服之後  
常朝止便服惟朔望具公服朝參其武官應直守衛者不

拘此服其公服花樣一品大獨科花徑五寸二品小獨科  
花徑三寸三品散搭花無枝葉徑二寸四品五品小雜花  
紋徑一寸五分六品七品小雜花紋徑一寸八品以下無紋  
公侯駙馬伯公服服色花樣與一品同文武官公服花樣  
如無從織造則用素

凡陪祭服一品至九品青羅衣白紗中單俱用阜領緣赤  
羅裳阜緣赤羅蔽膝方心曲領其冠帶佩綬等第並同朝  
服其家用祭服三品以上去方心曲領四品以下並去佩

綬已上會典  
王圻通考

二年賜朝臣袍帶凡二千八百一十三人奉明夢  
餘錄

三年定凡文武官常朝視事以烏紗帽圓領衫束帶爲公服其帶一品玉二品犀三品金釵花四品素金五品銀釵花六品七品素銀八品九品烏角

王圻通考

四年中書省議定侍儀舍人併御史知班引禮執事冠進賢冠無梁服絳色衣

同上

二十三年三月定朝臣衣服之制上見文臣衣服之制多取便易日至短窄有乖古制乃詔禮部尙書李原名等參酌時宜文官衣自領至裔去地一寸袖長過手復回至肘公侯駙馬與文官同武官去地五寸袖長過手七寸景泰四年令錦衣衛指揮侍衛者得衣麒麟服

成化二年令官民人等不許僭用服色花樣

宏治十三年奏定公侯伯文武大臣及鎮守守備違例奏

請蟒衣飛魚衣服者科道糾劾治以重罪

已上會典

御史范輅清軍江西甯王宸濠令諸司以朝服見輅奏言

高帝定制王府屬僚稱官後乃稱臣其餘文武及京官出

使者皆稱官朝使相見以便服今天下王府儀注制未畫

一臣以爲尊無二上凡不稱臣者皆不宜具朝服以嚴大

防章下禮官議宸濠馳疏爭之廷議請如輅言

范輅傳

正德元年敕官員及軍民人等衣服帳幔不許用元黃紫

三色其朝見人員四時並用顏色衣服不許純素

王圻通考

十三年正月帝至自宣府傳旨用曳襪大帽鸞帶且賜羣臣大紅紵絲羅紗各一其綵繡一品斗牛二品飛魚三品蟒四品麒麟五六七品虎彪翰林科道官不限品級皆與焉惟部曹以下不與言官論其非制不納

三編

質實云五行志曳襪大帽行役所用非見君服皆服妖也又文臣服色亦以走獸而麒麟之服逮於四品尤異事也

十六年世宗登極詔云近來冒濫玉帶蟒龍飛魚斗牛服色皆庶官雜流並各處將領夤緣奏乞今俱不許武職卑官僭用公侯服色者亦禁絕之

輿服志

嘉靖六年禁中外官不許濫服五采妝花織造違禁顏色  
會典

七年製忠靜冠服圖頒禮部敕諭之曰祖宗稽古定制品  
官朝祭之服各有等差第常人之情多謹於明顯忘於幽  
獨古聖王慎之制元端以爲燕居之服比來衣服詭異上  
下無辨民志何由定朕因酌古元端之制更名忠靜庶幾  
乎進思盡忠退思補過焉朕已著爲圖說如式製造在京  
許七品以上官及八品以上翰林院國子監行人司在外  
許方面官及各府堂官州縣正堂儒學教官服之武官止  
都督以上其餘不許濫服

八年更定百官祭服上衣青羅阜緣下裳赤羅阜緣蔽膝

綬環大帶革帶佩玉襪履俱與朝服同

己上王圻通考

十六年羣臣朝於駐蹕所兵部尙書張瓚服蟒帝怒諭閣

臣夏言曰尙書二品何自服蟒言對曰瓚所服乃欽賜飛

魚服鮮明類蟒耳帝曰飛魚何組兩角其嚴禁之

輿服志

萬厯五年令常朝俱衣本等錦繡服色其朝覲官見辭謝

恩不論已未入流公服行禮

會典

閣臣王錫爵疏臣伏見連日大雪風寒異常百官尙未蒙

恩傳戴暖耳祖宗二百年來歲傳暖耳示體恤於等威之

外所以百官傳衣不謝而傳暖耳獨謝此燔肉醢酒之類



物微禮重不可忽也

春明夢餘錄

崇禎十三年上諭禮部令百官燕居皆用世廟所製忠靜冠服賜閣臣五人一襲復以二襲下部爲式

同上

### 士庶冠服

洪武三年士庶戴四帶巾改四方平定巾雜色盤領衣不許用黃

集禮

又令庶民男女衣服不得僭用金繡錦綺紵絲綾羅止許紬絹素紗其鞞不得裁製花樣金線妝飾首飾釵鐲不許用金玉珠翠止用銀

六年令庶民巾環不得用金玉瑪瑙珊瑚琥珀未入流品

者同庶民帽不得用頂帽珠止許水晶香木

十四年令農民許衣紬紗絹布商賈止衣絹布農家有一

人爲商賈者亦不得衣紬紗

已上會典

二十四年十月丁巳定生員巾服之制帝以學校爲國儲材而士子巾服無異吏胥宜更易之命秦遼製式以進凡三易其制始定命用玉色絹爲之寬袖阜緣帛繚輭巾垂帶命曰襴衫上又親服試之始頒行天下

昭代典則

洪熙中帝問衣藍者何人左右以監生對帝曰著青衣較

好乃易青圓領

輿服志

二十五年禁庶人不許穿鞞止許穿皮札鞞惟北地苦寒

許用半皮直縫鞞

正德元年禁商販僕役倡優下賤不許服用貂裘

已上會典

嘉靖二十二年禮部言近日士民冠服詭異製爲凌雲等巾僭擬多端有乖禮制詔所司禁之

憲章錄

萬厯二年禁舉人監生生儒僭用忠靜冠巾錦綺鑲履及張繖蓋戴暖耳違者五城御史送問

輿服志

### 寶璽

明制各寶皆內尚寶監女官掌之遇用寶則尚寶司以揭帖赴尚寶監尚寶監請旨然後赴內司領取

西垣筆記

每年三月二十九九月二十九爲用寶之期先期請出洗

滌尚寶太監用大黃絨綠兩手恭捧挂於項尚寶卿以金

盆盛水濯之次日乃用

玉光劍  
氣集

寶璽共二十有四舊寶十七

按輿服職官二志皆云舊寶十七覈其數止十六非闕卽

謂曰皇帝奉天之寶爲唐宋傳璽祀天地用之若詔與赦

則用皇帝之寶冊封賜勞則用皇帝行寶召親王大臣及  
調兵則用皇帝信寶上尊號則用皇帝尊親之寶諭親王  
則用皇帝親親之寶其天子之寶以祀山川鬼神天子行  
寶以封外國及賜勞天子信寶以招外服及徵發誥用制  
誥之寶敕用敕命之寶獎勵臣工用廣運之寶敕諭朝覲  
官用敬天勤民之寶若御前之寶表章經史之寶欽文之

寶則圖書文史等用之世宗增製者七爲奉天承運大明  
天子寶爲大明受命之寶爲巡狩天下之寶爲垂訓之寶  
爲命德之寶爲討罪安民之寶爲敕正萬民之寶

職官志

洪武元年正月庚辰得美玉製傳國之寶

大政記

二年五月造小玉璽一文曰奉天執中

同上

二十五年大學士周敬心上疏諫曰臣聞陛下連年遠征  
北出沙漠爲恥不得傳國璽耳昔楚平王時琢卞和之玉  
至秦始名爲璽歷代遞嬗以迄後唐治亂興廢皆不在此  
石敬瑭亂潞王攜以自焚則秦璽固已燬矣敬瑭入洛更  
以玉製晉亡入遼遼亡遺於桑乾河元世祖時札刺爾者

明倫彙編 禮儀典 三十一  
漁而得之今元人所挾石氏璽耳昔者三代不知有璽仁  
爲之璽故曰聖人大寶曰位何以守位曰仁陛下奈何忽  
天下之大璽而求漢唐宋之小璽也

周敬  
心傳

建文三年正月辛酉朔凝命神寶成帝親定其文曰天命  
明德表正萬方精一執中宇宙永昌先是使者還自西方  
得青玉於雪山方踰二尺質理溫栗二年正月命工人琢  
爲大璽至是工成告天地宗廟御奉天殿受朝賀

淵鑿  
類函

宣德九年衛拉特托歡襲殺阿魯台來告捷且獻玉璽帝  
賜敕曰王殺阿魯台見王克復世仇甚善願王言玉璽傳  
世久遠殊不在此王得之王用之可也賜遣之

三編

宏治十三年陝西巡撫熊翀以鄠縣民所得玉璽來獻以爲秦璽復出也禮部尙書傅瀚率同列言秦璽完毀俱載簡冊今所進璽形色篆紐皆不類蓋後人做爲之且帝王受命在德不在璽太祖製六璽列聖相承百三十餘載天休滋至受命之符不在秦璽明矣請姑藏內府帝是其言

傅瀚傳

天啟四年臨漳民耕地得玉璽龍紐龜形方四寸厚三寸文曰受命於天旣壽永昌以獻巡撫程紹紹聞於朝略言秦璽不足徵久矣今璽出適在臣疆旣不當復埋地下又不合私祕人閒欲遣官恭進闕廷迹涉貢媚故先奏聞昔

王孫圉不寶玉珩齊威王不寶照乘陛下尊賢愛士所寶在德尙有一代名賢如鄒元標馮從吾王紀周嘉謨盛以宏孫慎行鍾羽正余懋衡曹于汴等及詞林臺諫一銅不起者願汲致明廷亟圖登進

程紹傳

八月程紹進璽於朝魏

忠賢欲侈其事命由大明門進行受璽禮百僚表賀御史黃尊素上言昔宋哲宗得璽蔡確等競言祥瑞改年元符宗祚幾不競本朝宏治時陝西獻玉璽止令取進給賞五金此祖宗故事宜從事獲中止

黃尊素傳

印信

洪武初禮部設鑄印局凡諸司印信該局專管鑄造如有



剗削則換給之凡在外文移到京悉送該局辨其真偽

王

通考

一二品銀印三品以下銅印方厚有差惟京尹以三品得

用銀印

強識略

九年考較錢穀策書空印事起主印吏及署字有名者皆逮繫獄凡數百人帝以爲欺罔守令署印者欲置之死佐

貳以下爲軍遠方

鄭士利傳

徐達還鎮每歲春出冬暮召還以爲常還輒上將印

徐達傳

十三年十二月改雜職衙門方印爲條記

大政記

十四年改都察院分設十二道每道鑄二印文曰繩愆糾

日重身卷二七  
七  
繆守院御史掌其一其一藏內府有事則受以出復命則

納之

職官志

二十年收馮勝大將軍印

馮勝傳

二十三年改製某道監察御史印其奉差者則曰巡按某

處監察御史

職官志

永樂六年駕幸北京五府六部都察院大理寺錦衣衛各衙門各鑄印信通政司鴻臚寺各鑄關防謂之行在衙門印信關防其後命內府印綬監收貯嘉靖十八年南巡禮部領出以給扈從者焉

輿服志

胡濙爲行在禮部尙書會行在禮部印失詔弗問命改鑄

已又失被劾下獄未幾印獲復職

胡淡傳

仁宗立鑄征南將軍印給沐晟沐氏繼鎮者輒予印以爲

常沐英

傳

宣宗賜文淵閣印一顆凡封進票本揭帖聖諭敕稿用此

鈐之萬厯中被人盜去上命補鑄賜之

玉光劍氣集

宏治十四年議准在外大小衙門印記年久平乏模糊者

許申知上司驗實具奏補換新印將舊印繳納

王圻通考

正德四年兵部受劉瑾屬奏固原總兵曹雄鎮守未佩印

宜如各邊例特賜印以重其權乃進雄署都督同知以延

綏總兵官吳江所佩征西將軍印佩之而別鑄靖虜將軍

印子江

曹雄傳

教坊司臧賢請改鑄方印禮部尙書傅珪格不行

傅珪傳

嘉靖二十九年仇鸞總督京營戎政故事五軍府開府給

印營操官不給印戎政之有府與印自仇鸞始

兵志

總制總督巡撫及鎮守公差等官給銅關防惟正德時張永征安化王用金鑄嘉靖中顧鼎臣居守用牙鏤關防皆

特賜也

王圻通考

五城巡視御史向無關防萬厯間始鑄給而南京五城亦

得之

野獲編

賜印

太祖賜懿文太子玉印曰大本堂記賜皇后玉印曰厚載之記

仁宗賜蹇義夏原吉楊士奇黃淮楊榮金幼孜等印曰繩愆糾繆而義又有蹇忠貞印士奇又有楊貞一印

宣宗賜印蹇義曰忠厚寬宏夏原吉曰含宏貞靜楊士奇曰清方貞一楊榮曰方直剛正胡濙曰清和恭靖又曰文恭世家吳中曰和敏詳達

景帝賜印胡濙曰忠貞惟篤王文曰忠誠匪懈衍聖公孔宏緒曰謹禮崇德

世宗賜印楊一清曰耆德忠正又曰繩愆糾違張孚敬曰

忠良貞一桂萼曰忠誠靜慎李時曰忠敏安慎方獻夫曰  
忠誠直諒費宏曰舊輔元臣夏言曰學博才優顧時曰經  
幃首選翟鏊曰清謹學士

神宗賜張居正印曰帝賚忠良

已上王  
圻通考

### 符節

洪武四年五月造用寶金符及調發走馬符牌用寶符爲  
小金牌二中書省大都督府各藏其一有詔發兵省府以  
牌入內府出寶用之走馬符牌鐵爲之共四十金字銀字  
者各半藏之內府有急務調發使者佩以行尋改爲金符  
凡軍機文書自都督府中書省長官外不許擅奏有詔調

軍省府同覆奏然後納符請寶

兵志

十五年製使節使者受命則載以行使歸則持之以復命  
二十三年詔考定使節之制禮部奏漢光武時以竹爲節  
柄長八尺其毛三重而黃公紹韻會註漢節柄長三尺毛  
三重以旄牛爲之詔從三尺之制

輿服志

洪武中命大將儀先授節次授鉞

弁山別集

凡宣召親王必遣官齎金符以往親王之藩及鎮守巡撫  
諸官奏請符驗俱從兵部奏行尙寶司領之洪武二十六  
年定制凡公差以軍情重務及奉旨差遣給驛者兵部既  
給勘合卽赴內府關領符驗給驛而去事竣則繳

輿服志

英宗北狩襄王瞻墀長且賢眾望頗屬太后命取襄國符入宮不果召英宗復辟石亨等誣于謙王文有迎立外藩語帝頗疑瞻墀久之從宮中得瞻墀所上二書而襄國金符固在太后閣中乃賜書召瞻墀襄王傳按春明夢餘錄云于少保之死當時誣以迎立外藩王文極口辨公但云召親王非金符不可符在何必辨時印綬監諸瑤檢閱各府金符俱在獨無襄府者問一退閑老監云是宣廟上賓時張太后以國有長君社稷之福欲召襄王取符入三楊議不合而止符留後宮於是啟而得之塵積寸餘矣

牙牌

洪武八年二月製陪祀官入壇牙牌

大政記

陪祀官曰陪供

事官曰供執事人曰執

職官志



十一年三月丁酉始製牙牌給文武朝臣

大政記

牙牌之號五以察朝參公侯伯曰勳駙馬都尉曰親文官曰文武官曰武教坊司曰樂嘉靖中總編曰官字某號朝參佩以出入不則門者止之私相借者論如律有故納之

內府

職官志

景泰元年馬順前爲廷臣擊斃尙寶司檢順牙牌不得順子請責之王竑帝許焉諸諫官言順黨奸罪重廷臣共除之邊問牙牌且非竑一人事若責之竑忠臣懼矣乃寢前

旨

王竑傳

劉珣子銑八歲時憲宗召見愛其聰敏且拜起如禮卽命

爲中書舍人宮殿門閤高同官楊一清常提之出入帝慮

牙牌易損命易以銀

劉珣傳

孝宗嗣位諸臣交章劾萬安帝命太監懷恩就安讀之安跪起求哀無去意恩直前摘其牙牌曰可去矣始乞休去

萬安傳

正德中教坊司臧賢請易牙牌製如朝士禮部尙書傅珪

格不行

傅珪傳

明會要卷二十四終

明會要卷二十五

永新龍文彬纂

學校上

國學

廢監詳職官任子

太祖乙巳九月丙辰朔置國子學以故集慶路學爲之政大記

洪武元年令品官子弟及民間俊秀通文義者並充學生尋詔擇府州縣學諸生入國子學又擇年少舉人趙惟一等及貢生董景等入學讀書命於諸司先習吏事謂之厯事監生取其中尤英敏者李擴等入文華武英堂說書謂

日食身卷二二三  
之小秀才其才學優贍聰明俊偉之士使之博極羣書講  
明道德通經之學以期大用謂之老秀才

選舉志

洪武二年太祖諭中書省臣曰太學育賢之地所以興禮  
樂明教化賢人君子之所自出古之帝王建國君民以此  
爲重朕承困弊之餘首建大學招徠師儒今學者日眾齋  
舍卑隘不足以居其令有司增益學舍

大訓記

是年擇國子生試用之巡行列郡舉其職者竣事復命卽  
擢行省左右參政各道按察使僉事及知府等官

五年以國子生王鐸攝監察御史

已上王圻通考

八年選國子生林伯雲等三百六十六人分教北方

大政記

十五年五月己未新建大學成改爲國子監分六堂以館諸生曰率性脩道誠心正義崇志廣業庚午命劉仲質立學規十二條合欽定九條頒賜諸生

明紀

太祖幸大學還馬皇后問生徒幾何帝曰數千后曰人才眾矣諸生有廩食妻子將何所仰給於是立紅板倉積糧賜其家大學生家糧自此始

馬皇后傳

十七年四月增築國子學舍

本紀

十九年命祭酒司業擇監生千餘人送吏部授知州知縣等職

二十年擢監生李慶署右僉都御史

已上王圻通考

二十一年十一月命禮部給賜國子生鈔在監三年以上者五錠二年人二錠俾製冬衣復命工部於國子監前造別室一區以處諸生之有疾者令膳夫二十人給役

世法錄

二十三年令本監闡射圃給監生弓矢習射

會典

二十四年選監生方文等六百三十九人命行御史事稽

覈天下百司案牘

二十五年擢監生師達墨麟等爲監察御史夏原吉爲戶

部主事

已上王圻通考

二十六年十月壬辰除監生二百四十一人爲教諭等官既又擢監生劉政龍鐔等六十四人爲行省布政按察兩

使及參政參議副使僉事等官

大政記

初以北方喪亂之餘人鮮知學遣國子生林伯雲等三百六十六人分教各郡後乃推及他省擇其壯歲能文者爲

教諭等官

選舉志

時國子生殷敏選入武英殿紀事授監察御史蓋其時儲養國學有出使歷事之任又有大本堂讀書武英殿紀事等清要之責故賢才輩多出其中

二十九年擢監生盧祥爲刑部郎中

王圻通考

建文二年十月更定歷事監生選法凡歷事一年爲滿考分三等上者授官次下者再歷一年復考上者授官次量

材選授下邳監肄業

昭代  
典則

永樂二年始以北平府學爲北京國子監八年重建左監

右學南雍六堂

王圻  
通考

仁宗初擢監生徐永潛等二十人爲給事中

本  
紀

宣德二年七月汰監生一千九百餘人南京汰監生千五

百餘人爲民

四年九月放免南北監生年老無成者二百五十三人上

大政  
記

北京國子監助教王仙言學校教養人材固當講習經史  
至於書數之學亦當用心近年生員止記誦文字以備科



貢其於字學算法略不通曉乞令兼習從提調正官按察  
司巡按御史考試從之通紀

七年四月己酉增建國子監學舍諸生有家室者給月糧

如南京例

大政記

正統三年十一月南京國子監祭酒陳敬宗上書言舊制  
諸生以在監久近送諸司厯事比年有因事予告者遷延  
累歲至撥送之期始赴實長奸情請以肄業多寡爲次第  
又近有願就雜職之例士風卑陋誠非細故請加禁止從  
之陳敬宗傳

景泰五年三月戶部侍郎孟鑑言國子生二千餘人俱仰

給官廩有名無實請留年深者千餘人餘悉放歸從之

通紀

成化四年吏部尙書李秉等奏近來監生記名聽選者八千餘名逐年起送到部者尤多於聽選之數先後積滯賢否混淆茲欲將該選監生考選身言書判四事俱可取者居優等選用三事二事可取者量才授任其無可取而年

貌衰老者令冠帶閒住從之

昭代典則

六年五月命襲封衍聖公孔宏泰朔望隨班朝參在監讀書一年乃許歸

同上

九年二月南京吏部尙書崔恭奏南雍監生厯事滿必抵北紀選而還卒業其中有貧乏者病於往復率多淹滯請

卽紀選於南吏部從之實錄

宏治八年定國子監生分撥歷事期凡歷事吏部四十一名戶部五十三名禮部十三名大理寺二十八名通政司五名行人司四名五軍都督府五十名謂之正歷三月上選滿日增減不定又有諸司寫本戶部十名禮部十八名兵部二十名刑部十四名工部八名都察院十四名大理寺通政司俱四名隨御史出巡四十二名謂之雜歷一年滿改上選三編

禮部尙書李時言國初監生俱由廣業堂積漸升率性堂始得積分故天順以前監生必作養十餘年然後撥歷後

積滯人多節將撥歷歲量減至宏治八年國子監有坐班人少不敷撥歷之期本部尙書倪岳題稱權宜救弊之法有二增貢額以足坐班生徒議差歷以久坐班歲月今國學缺人視宏治爲甚所有前項事例似應參酌舉行詔從

之春明夢餘錄

嘉靖八年廷議復申三途並用之例於是以舉人監生阮

徽歲貢監生張澍爲監察御史

王圻通考又云國初大學

生皆貢自郡邑選鄉學之秀者充之其後乃有各省鄉試舉人時進士之科未盛內而臺諫外而藩臬率以授諸大學生之成材者自制科既重大學生成材者與天下賢士盡入蒐羅於是內外要重之司皆歸進士而舉貢所稱監生者則有遺賢銓入高等不遇授以省府幕僚郡佐州正而臺諫藩臬則必待其歷官有譽而後得之然亦千百而什一耳

舉監 洪武十八年令會試下第舉人送監卒業

明史選舉志舉

人入監始於永樂但於洪武時明言擇年少舉人趙唯一等入學讀書則又兩歧茲据會典

三十一年試寄監下第舉人次第授教官

大政記

永樂二年六月命翰林院更試下第舉人擇文詞優等者得張鉉等六十人上召見皆賜冠帶送國子監肄業

憲章錄

四年三月親試下第周翰等四十二人送監進學

十三年三月再試下第舉人朱瑛等二十四人賜冠帶入

國學

已上大政記

宣德七年取下第胡概金庠等十餘人送監讀書

弁山集

八年三月帝命禮部尙書胡濙與大學士楊士奇楊榮選

副榜舉人龍文等二十四人送監進學

大政記

正統二年令副榜舉人不願就教職者入監卒業

成化十四年令南方舉人願入南監者聽

已上會典

嘉靖十七年二月詔許應天中式送國子學

明政統宗

萬曆十三年奏定凡舉人下第及中副榜不願就教者盡數分送兩京國子監肄業不許假借名色呈請順天府給

引回籍順天府亦不許徑自給引違者參究

會典

祭酒呂相言舉人在監本以觀光皇極薰陶德性今查在監實數天下之廣僅止二三十人蓋自會試之後支稱他故回籍荒廢學業及試期方迫監簿計水程用規撥歷未

仕如此居官可知勅該部將入監告回舉人移文行取申明  
明選限作曠計月加曠不許會試之條庶士類知儆眾向  
於學

春明夢餘錄

貢監 一曰歲貢洪武初命各學歲貢一人謂之歲貢其  
後例屢更宏治嘉靖間定府學歲二人州學二歲三人縣  
學歲一人遂爲永制一曰選貢宏治中從南京祭酒章懋  
言於常貢外令提學行選貢之法不分廩膳增廣生員通  
行考選務求學行兼優年富力強屢試優等者乃以充貢  
通計天下之廣約取五六百人三五年一行此選貢所由  
始也一曰恩貢國家有慶典或登極詔書以當貢者充之

一曰納貢視例監稍優其實相仿也

選舉志

洪武十六年正月司諫關賢上言邇來都邑所司非人師道不立及至選貢賢愚混淆其甚者將俊秀生員黜充承差有乖育才之意禮部尙書任昂奏定學校歲貢士法任昂傳

二月丙申命天下府州縣學自明年始歲貢生員各一人正月至京從翰林院試經義四書各一道判語一條中式者入監讀書不中者罰爲吏王圻通考

正統十四年令南直隸歲貢生俱送北監會典

天順五年令天下生員年四十以上者考選送國子監肄



業

王圻  
通考

成化十四年奏定南直隸歲貢生仍還南監

宏治十七年奏定歲貢生願就教者聽禮部考試不中者

分送南北監肄業

已上  
會典

萬厯中工科郭如心言選貢非祖制其始欲補歲貢之乏  
其後遂妨歲貢之途請停其選神宗以爲然至崇禎時又

常行之

選舉  
志

祭酒呂柟疏歲貢入監卽古鄉舉里選六德六行六藝之  
士故禮稱四十強仕近年有歲貢二十上下者其德行焉  
考甚且禮儀未嫻各提學惟取詞章不顧行檢遂使質樸

淪墜乞勅該部轉行提學官當歲貢期於食廩年深二三  
名內遵照祖宗臥碑參取德行必注其平日某德某行以

副敦崇實學之至意

夢餘錄

明史選舉志載會試副榜本載鄉試副榜按永春州志天啟元年凡鄉試副榜廩准監增附准廩至崇禎己卯皆准貢史稿略而不書然猶見故家藏有是科鄉試副榜全錄與永春志合據以備考

例監 景泰四年四月己酉令生員納粟爲國子生初洪武中監生與薦舉人材參用故其時大學生最盛迨薦舉既廢進士日重而監生輕至是納粟例開不久卽止然其後或遇歲荒或因邊警或大興工作率據前例行之而軍民子弟亦得援生員之例以入監謂之民生亦謂之俊秀

或竟謂之例監而監生日益輕矣

編三

成化二年南京大饑守臣建議欲令官員軍民子孫納粟送監禮部尙書姚夔言大學乃育才之地近者直省起送四十歲生員及納草納馬者動以萬計不勝其濫且使天下以貨爲賢士風日陋帝以爲然爲卻守臣之議

選舉志

十年十月禮部議科貢入監乃祖宗舊典納粟實一時權宜况納粟送監其復班之日多在科貢者入監之先若仍緣舊規以次取撥是使納粟者得以遂捷取之願而科貢者不能無淹困之嗟宜勅國子監於此兩途酌其多寡分序撥歷議上從之

昭代典則

宏治五年吏部尙書王恕奏自納粟等項事例既開雜進者日多一日以致正途監生壅滯不得出身候選至十五年以上纔得一官年紀日衰誰肯盡心職業况此等既以財進身他日豈能以廉律己貪財害民天下治安何由而得今後各處災傷任從巡撫等官多方區畫再有奏開前項事例聽從本部并科道官糾劾治罪

通紀

十五年令納粟諸項監生放回依親讀書其未冠者提學並教官嚴加考覈以入監日爲始扣滿十年方准起送赴

部復監

會典

嘉靖中祭酒呂相疏請飭部將依親例貢行各提學官考

行業類報其逃監及患病給假三月之外許臣查治重則

削其名籍

夢餘錄

崇禎五年十二月詔納粟輸貲原於正途之外以此鼓舞俊秀乃近年事例頻開吏途紛雜有貲即可博官才品俱所勿論甚而儼然民牧掊克取償貽害滋甚朕欲慎稽流品撫恤瘡痍而開納不除則源之不清流何能潔茲諭爾戶工二部從今爲始將近年新開各項事例盡行停止其以前曾經納過者照例銓選此後不得再行援納仍將議停款目奏請裁定

同上

勳戚入監

洪武二年四月令功臣子弟入學

本紀

五年三月令將官子弟承襲年幼者入國學會典

十年八月癸丑選武臣子弟讀書國子監本紀

十四年正月命公侯子弟入國學會典

十六年上慮武臣子弟頑梗繩愆廳不能扑罰命李文忠

兼領監事王圻通考

成化十年九月國子司業耿裕言勸戚子弟當先束身禮法乃采輯古諸侯貴戚言行可師者人授一編上聞而稱善乃詔侯伯及駙馬年少者皆入國子監讀書習禮不率者奏聞通紀

宏治六年副都御史張敷華奏准公侯駙馬伯子孫年十

五以上三十以下者送監照依監生讀書習禮

嘉靖元年題准公侯伯未經任事年三十以下遵照累朝舊典送監讀書命祭酒司業用心訓誨試驗是歲公侯入監者凡八人

九年題准公侯伯未任事送監者二十二

十五年祭酒呂相奏准公侯伯子孫舊規每日在監後偶從寬簡定以二八日期近年到監止二三人餘多不至乞勅該部轉行各爵戒飭子孫今後有違例久曠者許臣等參劾

十九年五月丙申國子司業王祖同請敕兩京公侯伯子

弟凡未仕者悉入成均俟學有成方請廕敘不率者本監

奏聞區處上從之

已上  
通考

土司入監 洪武二十一年播州宣慰使楊鏗并所屬宣

撫司官各遣其子來朝請入大學帝敕國子監官善訓導  
之

二十三年烏撒土知府阿能烏蒙芒部土官各遣子弟入

監讀書

建昌土官安配遣子僧保等四十二人入監讀書

永樂二年天全招討使高敬讓來朝遣其子虎入國子學

已上土

同傳



外蕃入監 洪武五年高麗國王請遣子弟入大學朝鮮傳

二十五年琉球中山貢使以其王從子及寨官子偕來請

肄業國學從之其冬山南王亦遣從子及寨官子入國學

琉球傳

成化十八年四月琉球國中山王尙真奏乞以陪臣子蔡

賓等五人於南監讀書許之昭代典則

### 府州縣學

洪武二年十月詔天下府州縣立學諭中書省臣曰學校之設名存實亡兵變以來人習戰爭朕惟治國以教化爲先教化以學校爲本京師雖有大學而天下學校未興宜

令郡縣皆立學於是設學官令生員專治一經以禮樂射

御書數設科分教

昭代典則

初太祖改婺州爲甯越府以王宗顯知府事宗顯故儒者博涉經史開郡學聘葉儀宋濂爲五經師戴良爲學正吳沈徐源爲訓導自兵興學校久廢至是始聞絃誦之聲

王宗顯傳

十三年八月命在京府學生員六十人在外府學四十人

州學三十縣學二十人日給廩膳免其差徭二丁

王圻通考

十五年頒禁例十二條於天下學校鐫勒臥碑置明倫堂

之左其不遵者以違制論

會典

十七年十一月庚午命遼東立學校上諭禮部曰或言邊境不必建學夫聖人之教猶天也天有風雨霜露無所不施聖人之教亦無往不行昔箕子居朝鮮施八條之約故男遵禮義女尙貞信管甯居遼東講詩書陳俎豆飾威儀明禮讓而民化其德曾謂邊境之民不可以教乎況武臣子弟久居邊境鮮聞禮教恐漸移其性今使之誦詩書習禮義非但造就其才他日亦可資用

昭代典則

二十年令增廣生員不拘數

王圻通考

二十六年定學官考課法專以科舉爲殿最九年任滿覈其中式舉人府九人州六人縣三人者爲最舉人少者爲

平等至少全無者爲殿

選舉志

永樂二年禮部奏北方歲貢生員入學十年考不中式者例當充吏帝曰責人之功當量其力論人之罪當明其情北方近三四年兵戈擾攘諸生舍俎豆而事軍旅飛芻挽粟之勞奔走流離之苦奚暇爲學今考不中式者可發回原學肄業以俟再試不中如例處之

大訓記

正統十二年三月鳳陽知府楊瓚言民間子弟可造者多請增廣生員毋限額禮部採瓚言考取附學天下學校之有附學生由瓚議始

楊瓚傳

天順六年令廩膳有缺於增廣內選補

嘉靖二年令增順天府學廩膳生員二十名三年令增應天府學廩膳增廣生員順天府學增廣生員各二十名十一年奏准承天府學廩膳增廣六十名

已上王圻通考

### 宗學

萬厯中定宗室子十歲以上俱入宗學於宗室中推舉一人爲宗正領其事尋增宗副二人子弟入學者每歲就提學官考試衣冠一如生員已復令一體鄉試許得中式其後宗學寢多頗有致身兩榜起家翰林者

選舉志

鎮國中尉睦楔爲周藩宗正領宗學約宗生以三六九日午前講易詩書午後講春秋禮記雖盛寒暑不輟

周王傳

社學

洪武八年正月詔天下立社學

三編

方克勤知濟甯府立社學數百區

克勤傳

十六年詔民間立社學有司不得干預

會典

吳良守江陰暇則延儒生講論經史新學宮立社學

吳良傳

二十年令民間子弟兼讀御製大誥及律令

會典

宣德時王翱巡按四川奏州縣及土司徧設社學

王翱傳

正統元年令各處提學官及司府州縣官嚴督社學不許

廢弛其有俊秀向學者許補儒學生員

會典

成化初楊繼宗爲嘉興知府大興社學民間子弟八歲不

就學者罰其父兄

續宗傳

南安知府張弼毀淫祠百數十區建爲社學

張弼傳

宏治十七年令各府州縣建立社學選擇明師民間幼童

年十五以下者送入讀書講習冠婚喪祭之儀

會典

嘉靖中徐階爲延平府推官攝郡事勅鄉社學

徐階傳

萬厯中林培爲新化知縣縣僻陋廣置社學教之

馬經綸傳

### 武學

洪武二十年七月禮部請立武學開武舉不許曰是歧文

武爲二也

昭代典則

宣德十年英宗卽位詔天下衛所皆立學

正統六年設京衛武學除教授一員訓導六員教習勳衛子弟以兵部司官提調

七年設南京武學

已上大政記

自正統以來天下軍衛子弟多習儒業其勳戚子孫襲爵者習禮肄業於國子監至各衛幼官暨子弟未襲職者在

兩京並建武學如京府儒學之制

會典

成化元年四月申定武學學規凡十五則

大政記

三年令設衛學四衛以上軍生八十人三衛以上軍生六十人二衛一衛軍生四十人不及者不拘有司儒學軍生

二十人

王圻通考



九年命都司衛所應襲子弟年十歲以上者提學官選送武學讀書無武學者送衛學或附近儒學

十三年敕所司歲終考試入學武生十年以上學無可取者黜退送操已上會典

宏治六年三月從兵部尙書馬文升言刊武經七書分散兩京武學及應襲舍人大政記

嘉靖十五年四月改建武學於皇城西隅大興隆寺舊地

同上

二十一年題准直隸金山衛學添設廩膳二十名貴州普定等十三衛各添設廩膳生員二十名王圻通考

萬厯中兵部言武庫司專設主事一員管理武學

孫承澤春明夢

錄餘

御史左光斗請增畿南真順廣大四府武學同

崇禎十年令天下府州縣學皆設武學生員提學官一體

考取

選舉志

明會要卷二十五終